



ATASSUT

UKA 2015/36

Siverth K. Heilmann

24. 11. 2015.

**Nunatta pissarititai atorlugit sanaartornermut atortussiornermi tunisassiornissamik aallarnisaaniartut qanoq iliorluta tapersersinnaanissaat pillugit apeqquteqaat aallaavigalugu Inatsisartut oqallinnissaannik siunnersuut.**

(Inatsisartuni ilaasortaq Ineqi Kielsen, Siumut)

Inatsisartuni ilaasortaq Ineqi Kielsen, Siumut, apeqquteqaat aallaavigalugu oqallisissiaanut pingaaruteqartumu qujanaq, imatullu ATASSUT-miit oqaaseqarfigissavarput.

Siunnersuuteqartoq ilumoorpoq oqarami, nunatsinni tunisassiat nioqutissiallu nunaqqatitsinniit inerisarneqarsimasut takussaasut amerlagisassaannngitsut, tunisassiarineqarsinnaasullu nunatsinni ineriartortinneqarsimasut piukkunnartortalissuugaluartut. ATASSUT-miit isumaqataalluinnarpugut, sanaartornermut nutaaliernerunissamullu siunissamut aningaasanut inatsit aqutigalugu isumakkeerrinninniassasugut.

ATASSUT-miit arajutsisimanngilarput, Narsami Narsarsuarmilu, Sikublock atorlugi pitsaalluinnartumik ukiorpassuiarnilu atasinnaasumik, Jakob Knudsen sanaartornikuusoq. Naak sanaartorneq iluatsilluartutut ingerlaqqissinnaasutullu takussutissaqartitsilereeraluartoq, ajoraluartumik nalunaarusiortitsisimaneq qarmassiaq atorneqartoq, piumasaqaatinut tamakkiisumik naamassinninngissimasutut nalilerneqarnikuuvoq.

ATASSUT-miit siusinnerusukkut Sikublock ineriartortinneqaqqinnissaanut siunnersuuteqarnikuuvugut, ajoraluartumilli amerlanerussuteqarluartunik partiinit ilalerneqanngilaq, nalunaarusiortitsinermi piumasaqaatinut naamassinnissimannginneq tunngavilersuutigineqarluni. ATASSUT-miit uggorilluinnarsimavarput, tassami taamanikkut aporfissatut tikkuarneqarsimasoq annikitsuararsu-  
artut isikkoqartoq aaqqiivigineqarsinnaasutut isumaqarfigigatsigu, siunnersuineq piumasaqaateqarnerluunniit pimoorunneqarsimagaluarpat ingerlariaqqittoqarsimasinnaagaluarpoq.

Ilisimavarput Sikublock ingerlajunnaarnikuusoq, siunnersuuteqartutuulli atortussiat nunatsinneersut iluaqutiginerunissaanut ilisimalikkat annertusarnissaanut politikkikkut sapiissuseqarnerulluta aq-  
qutissiuussinissarput suli pikkoriffiginerusariaqaripput ATASSUT-miit isumaqarpugut. ATASSUT-  
miit maluginiarparput nuannaarutigalugulu aamma Naalakkersuisut akissuteqarnermikkut tunngaviusumik inerisaanissaq tapersersormassuk.



Ukiuni makkunani siusinnerusukkullu, sanaartornerit akisoqisut sannarlutat, iluarsaaqqinnerit oqullu ajornartorsiutaaginnarani inuup peqqissusaanut akornutaavoq. Sanaartortartut suliassaqarnissaat suliassaqartitsinissamullu iluaqutaagaluaqisoq, ATASSUT-miit isumaqarpugut, siunissami saneqqussinnaanngikkipput, akikinnerusumik attartunerusumillu sanaartorneq aalluttariaqaleripput. Piffissanngorpoq sanaartoriaatsimut nutaamut oqallillutalu pimoorussinerunissarput, qarmasissiarlu atorlugu pikkorissaanerit inerisaanerillu aalluttariaqalerigut.

Siunnersuuteqartup tunngavilersuutai ersarilluinnarput isumaqatiginarlutillu aammalu Naalakkersuisut akissutaat suleqataarusunnerallu maluginiarparput. Nunani allani issittoqarfiusuni qarmasissiamik illorpassuit inissiarpassuillu, ukiorparujussuarni allanngorneq ajortut sananeqarsinnaassappata, sooq uvagut aamma nunatsinni taamatut iliorsinnaassanngilagut. Suliffeqarfiit inuillu namminerisaminnik qarmasissiamik nunatsinni sanatitserusuttut aqutissiuutissagutsigit, suliffeqarfiit taamatut aallussinissamik eqqarsartut politikkikkut aqutissiuutsigit.

Siunnersuuteqartup Naalakkersuisunut inatsisartunullu kaammattuutaa ATASSUT-miit taperserparput. Taakkuupput ATASSUT-miit siunnersuummut oqaatigiumasagut qujaqqippugullu siunnersuuteqartumut isummersoqqinnissamut periarfissikkatsigit.